

釋 尊 傳

佛 學 小 叢 書

上 海 佛 學 書 局 印 行

釋尊傳

目次

古佛授記
菩薩擇降
太子幼學
決志出家
獨修苦行
成菩提道
鹿園說法
杖林說法

反國說法
舍衛行化
隨緣說法
攝化調達
報父母恩
雙樹示疾
最後說法
入大涅槃

附佛史頌釋

釋尊傳自叙

震旦風俗，崇尚鬼神。中世佛教西來，舊習未能遽化，視佛菩薩類於鬼神；故所以敬鬼神者轉以敬佛，所以事鬼神者轉以事菩薩。然佛與菩薩不可妄求，遂謂其靈不如鬼神；而敬事之心，反不若對於鬼神者之肫篤；致佛教規儀，視爲具文矣。是無他，未知佛之真相故也。佛有三身：一曰法身，普現世界，廣大無窮矣。二曰報身，現於色究竟天，高大千丈矣。三曰應身，衆生機熟，感應而現；八相

成道，其跡甚著，而其事可徵；况成道以後，說法四十九年，三藏所載，淵博無涯。先儒經典，莫之能及。至於法雨所施，則大千世界，六道衆生，皆爲所沾溉；洵所謂上天下地，唯佛獨尊者也。天且不違，而况於鬼神乎？故特摭其事蹟，分課十六，以授蒙童；俾幼而習焉，不復爲鬼神所惑。若夫教理宏深，非此篇所堪載述，故不贊焉。時惟釋尊降世二千四百六十九年，歲在辛亥，孟冬之月，嘉禾范古農識。

釋尊傳

古佛授記

釋尊在昔然燈佛世，作善慧仙人，以銀錢五百，買蓮華五莖，供養於佛。時王大臣，禮佛散華，華悉墮地；善慧五華，皆住空中，化成華臺。佛讚善慧：「汝過阿僧祇劫，當得成佛，號釋迦牟尼。」時善慧見地濁溼；脫鹿皮衣，以用布地，解髮以覆之，待佛行過。佛記之曰：「汝後作佛，當於五濁惡世，度諸天人。」善慧求佛出家；佛言：

「善來比丘。」剃除鬚髮，著袈裟衣，卽成沙門。遂合掌以偈讚佛：「今見世間導，令我開慧眼，爲說清淨法，去離一切著。今遇天人尊，我今得無生，願將來獲果，亦如兩足尊。」

菩薩擇降

釋尊昔從迦葉佛所，護持禁戒，梵行清淨；命終之後，正念往生兜率陀天，稱爲護明菩薩。爲諸天主，說一生補處之行；亦於十方國土，現種種身；爲諸衆生，隨應說法。期運將至，當下作佛；觀諸國土，何國最勝？觀諸種族，

何族尊貴？觀過去因緣，誰最真正，應爲父母？卽自思惟：『有迦維羅國，於此三千大千世界，此閻浮提，最處其中。諸族種姓，刹帝利第一。瞿曇苗裔聖王之後，其淨飯王，於諸世間，具足清淨；性行仁賢，聰明智慧；夫妻真正，堪爲父母。卽當於彼王種中生。』

太子幼學

菩薩既擇純潔之王種，遂降神焉。其母曰摩耶夫人。及月辰，夫人遊於藍毘尼園，而誕太子。淨飯王大悅，召梵士而名之，曰悉達多。越七日，夫人薨；乃命其妹波闍波提

爲保姆，以養育之。太子年七歲，以婆羅門之學者跋陀羅尼爲師；教之文字，以及五明。五明者：聲明，工巧明，醫方明，因明，內明也。又命毘奢蜜多羅授以吠陀經。太子資性英敏，未久而盡通所學。文事旣嫻，更講武藝；乃聘羸提提婆，教以兵戎法式；凡騰象，跨車，跳坑，越馬，善射，疾走等，二十九種。而太子技能，卓絕過人；大勇之名，著於當世。

決志出家

太子之初誕也；阿私陀仙相之曰：『太子具三十二相，非

凡人也。若在俗，必爲轉輪聖王；若出家，必爲三界之大導師。』是以父王恆慮太子出家，而斬王統也；多方以防之，爲建三時殿，選女樂數百，使侍焉。年十七歲，納善覺王女耶輸陀羅爲妃；日夜歌舞管絃，以娛樂之。然而太子以宿世善根福德力故；令所作歌曲，不順五欲之事；唯傳涅槃住持，信解微妙之聲。三次出遊，遇老病死者而反；慨人生之靡常，斯世之無可樂，而出家求道之懷，遂一發而不可遏。以請於父王，不允；及耶輸妃有娠，知足以慰父王矣；遂決志出家？

獨修苦行

太子年十九歲，二月八日中夜，命車匿牽馬，乘之出城；東行十七餘里，入阿拔彌河之深林；薙除鬚髮，脫寶服，被袈裟，命車匿還報父王曰：『早晚別離，世之常事；恆聚一處，豈可得乎。』乃訪跋伽仙；見其徒修苦行，問其所以；知畢竟苦，非安樂道；遂去而之阿羅邏仙人處，以究竟解脫爲問，令人非想非非想處定；太子不聽其說，又辭去，而訪鬱陀羅仙；知不愈阿羅邏，乃不復求師，獨行其道。往尼連禪河東岸，於正覺山中，擇觀行道場；端坐

凝思，日食一麻一米，如是者六年。

成菩提道

太子苦行六年，以體力憔悴，非堪得道；乃起沐浴于河，而受牧女之乳糜；遊行至佛陀迦耶，於畢波羅樹下，敷淨軟草而結跏趺坐焉。自誓曰：「我不成道，勿起此座矣。」深入禪定，經七七日，以觀察世出世間一切事理；降伏諸魔，得大解脫。最後之夕，於初更時，觀十方無量世界；二更時，觀三世之實相；三更時，洞見三界之因果；至四更明星出時，得一切種智，知三界是我所有，其中衆生

皆是我子；於是得成無上菩提，而爲三界之大導師，號曰釋迦牟尼佛。時實三十歲十二月八日也。

鹿園說法

佛成道已，思所以宣演其道，欲度阿羅邏，鬱陀羅二仙；知其已死，乃往波羅奈斯國；於鹿野園，度憍陳如等五人爲比丘。初轉法輪，說四聖諦；衆生淪於五濁，是謂苦諦；見思起惑造業，是謂集諦；斷惑不受後有，是謂滅諦；三十七助道品，是謂道諦。時國有長者子耶舍，聞法出家；父母及妻，咸歸依佛。是優婆塞優婆夷之始也。佛居鹿

園三月，而得弟子五十六人。乃往摩伽陀國，中途度三迦葉，各率弟子，弃事火法而來歸依。於是佛有弟子一千二百五十餘人。

杖林說法

佛率弟子，入王舍城。王及羣臣，迎佛於杖林，而供養焉。城民夙仰迦葉，見其事佛，咸怪之；迦葉乃爲演說歸依佛門之所以；於是城民，悉捨婆羅門教，而奉佛法。長者迦蘭陀迦，遂尼隄子之徒於竹園；頻婆沙王，建精舍焉，以奉釋尊。佛爲說法：『一切諸法，本無我及我所；凡夫

倒想，實我實法。若斷倒想，卽是解脫。諸善惡業，從情塵識三事而生；因之受報，流轉生死；此中何者謂是我耶？『佛居竹林精舍二年；被其教者，如舍利弗，目犍連，及摩訶迦葉輩；類皆博學多智，敏捷而有威德。』

反國說法

釋尊成道之五年，自吠舍離國之大林精舍，遷於靈鷲山。尋知父王疾病，乃反故國。父王力疾以迎，佛爲說法：順行正道，勿墮邪業；行法臥安，世世無患。爲耶輸妃說：過去因緣，令歸佛門，爲比丘尼，導異母弟難陀出家。命

舍利弗度其子羅睺羅。居三月而父王薨；闍維之際，佛告衆曰：『世間無常，苦空無我，無有堅固；如幻如化，如露如電。汝等諸人，但見此火，卽以爲熱；諸欲之火，恆復過是。是故汝等，當自勤勉，求離生死，乃得大安。』尋還王舍城；而優波離，阿耨樓陀，阿難陀等，追之中途，歸佛出家。

舍衛行化

釋尊還王舍城，止於尸陀林。時有給孤獨長者，舍衛城商人也；訪友而來王舍，友方供佛，與聞說法；大生信仰，

請佛及僧，受其布施；歸以多金購祇陀太子園；波斯匿王建精舍焉，迎佛居之。時蓋成道六年矣。處一年而聞法感化者益廣。自是八年之間，行化諸邑，恆以祇園精舍爲歸云。成道十七年，釋尊結夏於竹林精舍。頻婆沙王庶子之妹死，釋尊至其家爲說法曰：『王女生前，美麗可觀；今者遺骸，醜惡可厭，在世界者，一切無常，皆是幻夢。』越二年而復歸舍衛。

隨緣說法

成道十有八年，釋尊居祇園，度織工之誤殺其女者。十有

九年居竹林，巡化於摩伽陀國，度獵鹿者父子。二十年復居祇園，度鶩屈利，使懺悔而新生命。二十一年，選弟子阿難爲侍者。阿難博聞強記，凡已說今說諸法，無不憶持，故能結集三藏；一代教法，得傳於今者，是其功也。自後至三十六年間，釋尊恆於大林，祇園，及靈鷲山三處精舍；或于長者家，或於國王宮，或於道途際；隨緣所在，而爲說法；化者彌衆。四十年乃於靈鷲說法華經。互八載至四十九年而說畢焉。

攝化調達

佛敎範圍，日漸推廣；阻力之來，因亦屢見。如瞿伽利，善覺長者等之誹謗；如尼毘子徒，令孕女雜於比丘尼衆，以誣清淨；如室利毘多，設火坑毒飯，以陷害之；然未有如調達之甚者也。調達者，勇猛多智，能籠絡人；佯歸佛門，詐其弟子，以爲己黨；設五嚴戒，以苦徒衆，欲分裂其教徒；事卒不成。又嘗於山，轉墮大石，計戕釋尊三次而不遂。乃率其黨人五百，誘摩伽陀國太子，弑頻婆娑王，而奉彼法。時蓋釋尊成道之三十八年也。旣而阿闍世王，知爲所欺；捨供調達，詣佛懺悔，竟歸依佛。調達憤死

，其徒離散；至是而佛教光被，莫與抗矣。

報父母恩

昔佛之在迦維羅也；父王以香華幡蓋，往詣佛所。爾時釋尊爲說法曰：「作業果報，但隨世俗故有；非第一義。當知諸法空寂，空無空相，無相則無願；求一切諸法，皆具如是三解脫門。（空無相無願）當知諸根如幻，境界如夢。」王及釋種聞是法已，皆得無生法忍。及成道四十九年，釋尊以將入涅槃；乃昇忉利天爲母說法。曰：「身所經處，與苦樂俱；當修涅槃，永離苦樂。」佛母聞已；專精正念

，諸結消伏。時地藏菩薩受佛付囑，亦爲佛母說法；令諸天衆，悉發無量菩提之心。

雙樹示疾

成道四十九年，雨季已過；釋尊入吠舍離城，告諸弟子曰：『三月之後，我當去世；汝等於戒定慧，當護持修習。』乃往拘那尸城，中途受最後之供養於純陀；過迦屈多河畔，釋尊有疾暫憩焉；阿難取水於河，而供飲之；乃向醯蘭若河之娑羅樹林而進。既至，命阿難設牀于雙樹間；首北面西，右脇著席，延足安臥。於是阿難悲泣，請佛久住。

；佛告之曰：『汝勿憂愁！我告汝等！諸法無常，會必當離；過去如來，雖金剛身，亦爲無常之所變遷；我豈得獨異是耶？汝侍如來二十五載，以此功德，必成大果。』

最後說法

時拘尸那城有婆羅門須跋陀羅者，年百二十歲；知佛將入涅槃，來請說法；爲說四諦解脫之道，疑網大開，卽歸依佛。由是世尊告阿難曰：『於我滅後，勿憂無師；當尊奉波羅提木叉，是卽汝等大師也。』乃以四諦，三學，六度諸法，重申誥誡。且曰：『自利利他，法皆具足；自今以

後，我諸弟子展轉行之；則是如來法身常在而不滅也。汝等比丘，常當一心勤求出要；一切世間動不動法，皆是敗壞不安之相。汝等且止！勿得復語！時將欲過，我欲滅度；是我最後之所教誨。」

入大涅槃

佛遺教終，嘿然示寂；時蓋釋尊世壽八十歲之二月十五日也。佛既圓寂，弟子聞報；思在世之恩澤，悲滅後之寂寥；莫不泫然流涕，來自四方。拘尸那城主，主持葬事；奉金棺于天冠寺，誦經七日，以待長老摩訶迦葉。時迦葉行

化他方，途遇持天華自拘尸那來者；知世尊入滅，急趨而歸；奉釋尊遺骸，行荼毘禮；乃分舍利與八國，建塔婆以供養焉。於是摩訶迦葉命阿難陀結集世尊所說諸法，分爲經律論三藏；卒傳法焉。

佛史頌釋

范古農述

佛梵語佛陀，大覺之義，教主之德號。偈歌頌之類。
頌佛事迹，故曰佛偈。

佛教主 釋迦尊 大悲願 度衆生

教主，姓釋迦，此云能仁；名牟尼，此云寂默。一切世間所尊，故又號世尊。教主因地，曾發大悲宏願，度一切苦惱衆生，故來世間。度，救也。衆生，謂生緣不一，指一切生物而言。

佛生前 爲菩薩 教天人 住兜率

菩薩，此云大士，亞於佛之德號。兜率，此云知足，第四天之名。佛未生以前，爲一生補處菩薩，在兜率天，教化天人。

觀娑婆 察閻浮 瞿曇種 擇父母

娑婆，此云堪忍，此世界之名。閻浮，此云瞻部，吾人所居之南洲也。瞿曇，此云純淑。佛將下生，乃觀察世界，於瞿曇種族，擇其堪爲父母者。

迦毘羅 王淨飯 后摩耶 性慈愛

迦毘羅，此云黃色，印度古國名。淨飯，其國王之名，佛之父也。摩耶，此云幻術，其王后也；佛之母。性皆慈愛，故擇及之。

聖母寐 見瑞相 來入胎 乘白象

聖母摩耶，寤寐之際；見菩薩乘六牙白象，騰虛而來，從右脅入；身現於外，如處瑠璃；顧見自身，如日月照；故曰瑞相。

周昭王 歲甲寅 藍毘園 右脅生

周昭王二十四年，歲在甲寅，距今約三千年；是年四

月八日，聖母在藍毘尼園，舉手摘無憂樹花，菩薩漸從右脅而生，藍毘尼，此言可愛女也。

步蓮華 妙音發 卅二相 號悉達

佛初生時，地生七寶蓮華，大如車輪；佛於其上，自行七步，舉右手揚言曰：『天人之中，惟我最勝；無量生死，於今盡矣。』身黃金色，具足三十二大人相，名之曰悉達多。悉達多，此云頓吉；以佛生時，多現瑞相故。

幼入學 智無匹 文武藝 皆超絕

佛年七歲，父王命學士選友，授以文字典籍。年十歲，又命武士忍天，授以技術。佛以宿慧，皆不教而能；全國之士，莫可及者。

灌頂後 納瞿夷 苦老死 求脫離

佛年十六，父王爲行灌頂禮，立爲太子。年十七，納瞿夷夫人爲妃，處於王宮，極受五欲人樂。及遊觀四門，感老病死人之苦，乃求脫離之法，決計出家。

年十九 夜踰城 棄王位 作沙門

佛年十九，屢請於父，出家修行；父初不許。某夜，

命駕出城，北入山中，脫寶飾，剃鬚髮，著袈裟；永棄轉輪王位，而作沙門。沙門，此云勤息，出家修行人之稱。

入雪山 修苦行 六年間 習寂定

佛出家後，次第訪跋伽阿羅邏迦蘭諸士，知其皆無究竟解脫之術。乃獨往雪山，刻苦功用，至日食一麻一麥，修習禪定，凡有六年。

從定起 出山來 坐樹下 心鏡開

古佛未有從苦行中得道，要皆於菩提樹下成等正覺。

佛乃從定而起，受牧女乳糜，出雪山，逕至菩提道場，堅坐思惟；心光漸發，如鏡朗開，萬象畢現。

天龍喜 魔胆落 觀明星 成正覺

諸天龍王，知有佛成道，能度己類，故歡喜讚禮。魔王怖失眷屬，壞佛無效，懼而歸命。二月八日初夜，得天眼明；中夜，得宿命明；後夜，得漏盡明；拂星出時，朗然大覺；時乃周穆王二年癸酉，而佛下生蓋三十歲。魔，此云惡，欲界天頂有魔王天。

啓大教 說華嚴 塵刹海 現寶蓮

佛成道後，卽以已法教化衆生，不起樹下，身遍法界，稱性而談，一大部經。謂以萬德之華，莊嚴佛果，故曰華嚴。刹者，佛世界也；其多如塵，其深如海，故曰塵刹海。佛說華嚴經時，境界開廓，有十不可說佛刹微塵數世界種，皆在大蓮華上，分布而住；一世界種，各有不可說佛刹微塵數世界，在一蓮華上，故曰現寶蓮。

愍凡愚 不能聽 隱尊特 顯劣應

佛說華嚴，現法界無盡身，故曰尊特。但以此法，非

凡愚所解；乃從梵天勸請，憐愍此輩，顯示丈六劣應之身，住世普爲說法。

來鹿苑

說阿含

觀四諦

證羅漢

佛欲爲凡愚說法，乃往波羅奈斯國，鹿苑中，爲憍陳如五比丘等，說阿含經；凡有四部，令觀四諦之法：知苦，斷集，慕滅，修道，而證阿羅漢果。阿含，此云無比法。阿羅漢，此云無生。

第三時

演方等

斥偏小

褒大乘

佛說法，第一時華嚴，第二時阿含，今方等則第三時

矣。方，法也；等，遍也；羅漢志量狹小，惟知自利，不能利他；欲令回小向大，故說此遍等之法。如維摩楞伽等經，爲方等部菩薩大士所修之法。曰大乘，褒讚歎也。

靈鷲山

談般若

一乘轉

教菩薩

此第四時般若也。靈鷲山，梵名耆闍崛山，在王舍城。佛於此山、談六百卷大般若經，令二乘弟子，知第一義諦，回小向大之功已竟，故能轉教菩薩。般若此云智慧，此經有八部。二乘者，聲聞緣覺也；皆小乘。

果。

第五時 法華會 學無學 得授記

妙法蓮華經，亦在靈鷲山說。此經開顯圓滿究竟之法，在會聽衆，皆得究竟成佛。蓋佛教化凡愚，至此皆成聖種，故下云化道圓。學，指尙在學者；無學，指不須學者。授記，謂佛預記弟子成佛事迹也。

涅槃經 最後說 顯眞常 扶戒律

涅槃，此云圓寂，周徧不動之義。佛將圓寂，一日一夜爲說涅槃經，顯佛法身眞常之理，以解弟子之惑；

令弟子以戒律爲師，以期佛種之不斷；此與法華并爲一時

佛說法 判五時 五十載 畢於茲

佛所說法，可分如上五時。若別而言之：華嚴三七日中說，阿含十二年，方等八年，般若二十二年，法華八年，涅槃則一日一夜；計凡五十年而圓。

化道圓 歸真際 雙樹間 吉祥逝

佛來世間，本爲教化衆生，令悉成佛；今應度者已度，未度者亦已具足得度因緣，然則化道已圓，當歸真

際・眞際者，眞如實際，卽法身佛所住常寂光境也。雙樹者，謂佛將圓寂，於拘尸那國娑羅林中，雙樹之間；右脅著席而逝。右脅臥，謂之吉祥；時在周穆王五十二年壬申之歲二月十五日。

應化身 壽八十 示希有 輒圓寂

佛有三身：無相圓常者，法身也。無邊相好，菩薩所見者，報身也。今來世間，示現成佛者，乃應衆生得度因緣所感，而來化現，故曰應化身。示同世壽，止於八十；欲世人知佛法希有難遇，令不放逸。佛捨應

化身，復於無相圓常之法身，故曰圓寂。輒，速也。

言在經 容在像 佛法身 壽無量

佛圓寂後，弟子迦葉命阿難等，結集佛語，分爲經律論三藏。佛在世時，優填王以旃檀刻佛容像，傳於震旦者，其第四刻。佛應化身，雖已圓寂，而迄今誦經者，如聞其語；禮像者，猶覲其容，信乎佛之法身，勿可以世壽量也。

佛事迹 信有徵 誦斯偈 告世人

以上所述，教主應化事迹，載在經籍，信而有徵；末

世衆生，識量淺陋，未覩佛經，輒生疑謗，殊可憐愍；爲此因緣，誦斯三字佛偈，普告世人。願見聞者，咸生正信。

願佛教 徧大地 諸衆生 盡瞻依

佛教起於印度，南暨南洋諸島，東傳震旦朝鮮日本，北達新疆蒙古；近復以英人佔領印度因緣，令歐美學士，得識佛教經典；洵浸浸乎徧環球矣。願以此功德，普及諸衆生，咸令種善根，皈依吾佛教。

釋 尊 傳

佛 學 小 叢 書

中華民國二十一年四月初版

◎每冊定價大洋四分

編 述 者 佛 學 書 局 編 輯 部

出 版 者 佛 學 書 局

印 刷 者 國 光 印 書 局

上海新大沽路丁四十號

總 發 行 所 上 海 佛 學 書 局

開北新民路國慶路口

分 發 行 所 上 海 佛 學 書 局

北火車站東首寶山路口

2
252275
(207)

